

Kalaallit Nunaata inuiaqatigiillu kalaallit amerikamiut Kalaallit Nunaanni sakkutooqarnerat annertunerpaamik pissarsiaqaatigalugulu iluaqutigisinaanera qulakkeerniarlugu ataatsimoorussamik danskit/kalaallillu USA-mik isumaqatiginninniarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut. Naalakkersuisut Illersornissamut Isumaqatigiissut 1951-imeersoq tamatumalu kingorna tapiliunneqartut naapertorlugit USA-p Nunatsinni suliaqartarnerini nunatsinnut erseqqissunik iluaqutaanissaa suli sulissutigissavaat, tassunga ilanngullugu amerikamiut sakkutooqarfikui sanaartukkallu allat qimaannarneqarnikut pillugit avatangiisitigut akisussaaffiup paatsuugassaannigsumik inissinneqarnissaa, pisariaqarpallu tapiliussamik nutaamik isumaqatiginninniarnermik imaluunniit Illersornissamut Isumaqatigiissutip 1951-imeersup isumaqatiginninniutigineqaqqinnissaanik piumasaqaateqarlutik.
(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Saqqummiussissut

(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Siullermeerneqarnera

Inatsisartut aalajangiiffigisassaattut siunnersuut qulaani pineqartoq matumuuna saqqummiutissavara.

Pituffimmi sakkutooqarfik sullissinissamullu isumaqatigiissutit pillugit siusinnerusukkut Inatsisartuni oqaluuserineqaraangata illersornissamut isumaqatigiissut tamanut ammasumik annertuumik oqallisigineqartarpoq.

Naalakkersuisut isumaat ersarippoq. Nalinginnaasumik piumasaqaatitaqanngitsumillu annertunerusumillu aningaasaqarnermut tunngasut erseqqinnerusumik Kalaallit Nunaannut iluaqutaasussat nassuiarneqanngitsut, unammillerfeqartumik ammatitanik neqeroortitsisoqartarnermik Kalaallit Nunaannut iluaqutaasussat taamaallaat aalajangerneqartassappata Illersornissamut Isumaqatigiissut 1951-imeersoq, tamatumalu kingorna tapiliunneqartut, Kalaallit Nunaata soqutigisarisaata qulakkeernissaanut naammanngillat.

Illersornissamut isumaqatigiissutip nassatarisaanik USA-p suliaanut allanut naleqqiullugu, ilanngullugit Kalaallit Nunaanni amerikamiut sakkutooqarnikkut inississukkatigut qimatarpassui, maannakkut pissuserisat aamma akuersaarnartuunngillat.

Naalakkersuisut sulinerannut annertuumik pingaaruteqarpoq USA-mi ataatsimiinnerit nalaanni Nunanut Allanut Sillimaniarnermullu Ataatsimiititaliaq tamarmiusoq isumaqatigiilluni Naalakkersuisunut tapersiimmat. Maannakkut pissutsit Naalakkersuisut akuersaarsinnaanngilaat, tamatumani sillimaniarnermik isumaqatigiissutaasumit aalajangersimasunik iluaqutissanik Kalaallit Nunaat aamma inuiaqatigiit kalaallit Illersornissamut Isumaqatigiissutip 1951-imeersup tamatumalu kingornatigut tapiuliussat nassatarisaannik, qulaakkeeriffigineqanngimmata.

Kalaallini inuiaqatigiinnut tamarmiusunut nikerarpallaartunik iluanaaruteqarfiusartumik Pituffimmi kiffartuussinissamik isumaqatigiissutit, aningaasaqarnermut tunngasut erseqqinnerusumik Kalaallit

Nunaanut iluaqutaasussat nassuiarneqanngitsut, tutsuigisassatut qajannarpallaartutut aaqqissugaanera paasineqarsimavoq. Taamaattumik tassunga pineqartumi Naalakkersuisut iluarisimaarpaat ataatsimiititaliaq tamarmiisoq isumaqatigiilluni USA-lu atajuartussamik iluarsisuteqarniassamut Naalakkersuisut ilungersuuteqarnerat pillugu tapersersuimmat. Iluarsisuttip Kalaallit Nunaanni USA-p sakkutooqarnikkut najuuttuutuunera inuiaqatigiinnut kalaallinut sapinngisamik annertunerpaamik iluaqutaanissaa qulakkiissavaa.

Illersornissamut Isumaqatigiissutip 1951-imeersup, tamatumalu kingornatigut tapiuliussat iluanni, imaluunniit isumaqatigiissutigisanik piviusumik isumaqatiginninniaqqinnertut iluseqartillugu amerikamiut sakkutooqarnikkut najuunnerannik Kalaallit Nunaata aamma inuiaqatigiit kalaallit sapinngisamik annertunerpaamik iluanaaruteqarnissaat iluaquteqarnissaallu qulakkeerniarlugu Inatsisartut uani ataatsimoorlutik suliaqartariaqarput.

Ullumikkut erseqqissartariaqarpoq illersornissamut Isumaqatigiissummut 1951-imeersumut, tamatumalu kingornatigut tapiuliussanut tunngasunik Inatsisartut aalajangiiffigisassaattut siunnersuutinik inatsisartunut ilaasortaq Sara Olsvig Inuit Ataqatigiit aamma inatsisartunut ilaasortaq Hans Enoksen Partii Naleraq saqqummiussaqaarsimapput. Siunnersuutit taakku UKA2015-imi saqqummiunneqarput, maannakkullu ataatsimiinnermi aappassanneernissaannut oqaluuserisassatut inissinneqarsimallutik.

Aalajangiiffigisassatut siunnersuutip matuma Pituffik pillugu USA-lu maannakkut isumaqatiginninniarnerni allanngoriartorfiit kingulliit sianigai, siunnersuummullu siunertaq tassaavoq Inatsisartuni siamasissumik tapersersugaanissap qulakkeernissaa, aalajangiiffigisassatut siunnersuutip akuersissutiginera Kalaallit Nunaanni amerikamiut sakkutooqarnikkut najuuttuarnissaata kissaatigineqannginneranik tikkuaasumik, Kalaallit Nunaannut pingaarutilinnik aningaasaqarnikkut ilaqartoqassanngippat; Kalaallit Nunaanni amerikamiut sakkutooqarfigisimasaanni tamani, ilanngullugulu Pituffiup siunissami matuneqarsinnaanerani USA-mit aamma Danmarkimit paasisaqarnissamik saliisoqarnissamillu piumasaaqateqartoqassanerani; kiisalu siunissami Pituffiup matuneqarsinnaanerani USA-mik aamma Danmarkimik avatangiisinik akisussaaffik pillugu isumaqatiginninniarnarit aallartisarnissaannik Kalaallit Nunaat qulakkeerniarluni suliaqartariaqarneranik..

Taamatut oqaaseqarlunga oqallilluarnissassinnik kissaappassi.